



中国文献珍本丛书

晚清珍稀期刊汇编  
(十九)

全国图书馆文献缩微复制中心

晚清珍稀期刊汇编目录（十九）

渝报	·····	五二七
云南旬报	·····	五二七
美禁华工拒约报	·····	五八一

光緒二十三年十月上旬報

渝報夷一州

館設重慶府城白象街

渝報第一冊目錄

上諭恭錄

總署議擬御史胡孚宸請籌書局摺

官書局奏開辦章程摺

譯文擇錄

中國各報館始末

論報館

論新聞紙

外國新聞報館

學報序例

復古卽維新論

說渝報

渝城物價表

公法總論

渝報章程

富順宋育仁撰

富順宋育仁撰

巴縣梅際節撰

渝報第一冊目錄  
民國十三年十一月廿一日  
重慶商務印書館代印

諭旨恭錄

九月初五日 閣鈔

上諭刑部尚書著廖壽恒補授徐樹銘著補授都察院左都御史欽此

上諭吏部右侍郎著徐會澧調補張英麟著轉補禮部左侍郎禮部右侍郎著唐景

崇補授欽此

上諭陝西布政使著李希蓮補授玉瑾著補授貴州按察使欽此

上諭吏部奏遵議處分一摺刑部尚書薛允升著照部議降三級調用刑部郎中黨

蒙著降一級留任其分別議處之堂司各官刑部郎中英瑞熏成著罰俸一年刑

部尚書調補工部尚書松淮刑部左侍郎阿克丹兵部左侍郎調補翁場侍郎李

端棻刑部右侍郎文琳前刑部右侍郎調補吏部右侍郎徐樹銘均著罰俸六箇

月內閣侍讀薛浚著罰俸九箇月以上各員均著不准抵銷欽此

上諭貴州貴西道員缺著桂霖補授欽此

九月初六日 閣鈔

上諭徐樹銘著來京供職浙江學政著陸寶忠去俟出闈後即赴新任毋庸來京請  
訓欽此

上諭徐樹銘現已補授都察院左都御史未到任以前著許應騷兼署欽此

上諭兵部尚書仍著廖壽恆兼署欽此

上諭禮部左侍郎著徐會澧兼署欽此

上諭浙江紹興府知府員缺著繼恩補授欽此

九月初七日 閣鈔

上諭浙江學政著陳學棻去欽此

九月十四日 閣鈔

上諭江蘇蘇松太道員缺著蔡鈞補授欽此

九月十八日 閣鈔

硃筆徐承煜補授都察院左副都御史欽此

招奏錄要

總署議覆御史胡孚宸請籌議書局摺

奏為遵旨議奏仰祈聖鑒事光緒二十一年十二月二十二日准軍機處鈔交御史胡孚宸奏書局有益人才請飭籌議以裨時局一摺軍機大臣面奉諭旨著總理各國事務衙門議奏欽此欽遵到臣衙門查原奏內稱京師近日設有強學書局經御史楊崇伊奏請封禁在朝廷預防流弊立意至為深遠惟局中所儲藏講習者首在列聖聖訓及各種政書兼售同文館上海製造局所刻西學諸書繪印輿圖置備儀器意在流通祕要圖書考驗格致精蘊所需費用皆係捐資集股絕無迫索情事所刻章程尚無疵謬此次封禁不過防其流弊並非禁其向學倘能廣選才賢觀摩取善此日多一讀書之士即他日多一報國之人收效似非淺鮮請旨飭下總署及禮部各衙門悉心籌議官立書局選刻中西各種圖籍任人縱觀隨時購買並將總署所購洋報選譯印行以擴聞見或在海軍舊署開辦經理既善流弊自除庶於國家作育人才挽回時局之本心不相刺謬等因臣等維國勢之



強弱視乎人才人才之盛衰繫乎學校古者家塾黨庠州序國學自諸侯以達王畿莫不建學大而德行道藝細而名物象數綜貫靡遺是以人才日盛近世學者往往避實鶩虛舍難就易視西人一技之長一能之擅或斥爲異學或詫爲新奇不知西人之學無不以算學爲隱括西算之三角與中算之勾股理無異同周髀經曰圓出於方又曰方數爲典以方出圓言圓之不可御而馭之以方西人三角八綫之法實基於此餘若天學化學氣學光學電學重學礦學兵學法學聲學醫學文字製造等學皆見中國載籍試取管墨關列淮南諸書以類求之根原具在可知西學者中國固有之學西人踵而行之所謂禮失而求諸野耳泰西教育人才之道計有三事曰學校曰新聞報館曰書籍館英法德俄各國學校之盛或二三萬所或六七萬所生徒率皆二三十萬人美國學校多至十七萬餘所生徒幾及千萬人學校費用自三四千萬至八千餘萬不等率由國家及生徒各出其半名國富強之基實本於是庶政由人才而理人才由學術而成固有明效大驗該御史請將強學書局改歸官辦自係爲講求實學培養人才起見臣等公同商酌擬援照八旗官學之例建立官

書局 欽派大臣一二員管理聘訂通曉中西學問之洋人爲教習常川住局專司  
選譯書籍各國新報及指受各種西學並酌派司事譯官收掌書籍印售各國新報  
統由管理大臣總其成司事專司稽察所需經費由總理衙門於出使經費項下每  
月提撥銀一千兩以備購置圖籍儀器各國新聞紙及教習司事繙譯薪水等用核  
實散放年終由 臣衙門奏銷毋庸招股集貲設不敷用再由 臣衙門設法籌措如有  
慕義之士願捐鉅款或捐書籍准由司事呈明管理大臣酌定核收至建設學舍地  
方或假官房或相民宅取足教習各官起居之地兼爲士大夫入觀羣書之所因地  
制宜妥籌布置該御史所請就海軍舊署開辦之處應毋庸議如蒙 俞允再由管  
理大臣詳定章程定期開設再該書局現既奏明擇地另設其強學書局原屋應行  
文該地面官飭令屋主領回以清界限所有 臣等遵議緣由理合恭摺具陳伏乞  
皇上聖鑒訓示遵行謹 奏

官書局奏開辦章程摺

奏爲請

旨事光緒二十二年正月二十一日奏

上諭總理各國事務衙門奏新

設官書局請派大員管理一摺著派孫家鼐管理欽此臣恭奉 諭旨朝夕籌思且與原辦書局諸臣悉心酌度謹擬開辦章程分條臚列恭呈 御覽

一藏書籍擬設藏書院尊藏 列朝 聖訓 欽定諸書及各衙門現行則例各省

通志河漕鹽釐各項政書並請准其咨取儲存庋列其古今經史子集有關政學術業者一切購置院中用備留心時事講求學問者入院借觀恢廣學識 刊書籍擬

設刊書處譯刻各國書籍舉凡律例公法商務農務製造測算之學及武備工程諸

書凡有益於國計民生與交涉事件者皆譯成中國文字廣為流布一備儀器擬設

游藝院廣購化學電學光學諸新機礦寶地質動物植物各異產分別部居逐門陳

列俾學者心摹手試攷驗研求了然於目瞭然於心將來如製造船隻槍炮等事可

以別材質之良窳物價之低昂用法之利鈍不致受人蒙蔽一廣教肄擬設學堂一

所延精通中外文理者一人為教習凡京官年力富強者子弟之姿性聰穎安詳端

正者如願學語言文字及製造諸法聽其酌出學資入館肄習一籌經費總理衙門

原奏每月撥銀一千兩查局中用欸以延教習繕書籍為大宗此外譯報及書手匠

役人等工價伙食費亦不貲每月千兩只供各項之用至於購買圖籍儀器等款尙無所出原辦零星招股過於冗碎自應遵照原奏概行停止其慕義樂輸捐助鉅款者善堂書院有例可循亦應查照原奏酌核收納現在事屬刑行需款數難預定惟尙就現有經費次第興辦總以樽節爲充拓之基切戒濫費以收實濟 分職掌上年部院諸臣開設書局倉猝舉辦草定規模議事尙未盡一今擬將局前物各分職掌悉心專一可期日起有功所有在局辦事諸臣職名另單開呈 御覽一刊印信擬刻一本質關防文曰管理官書局大臣之關防凡向總理衙門領取經費及有行文事件卽以此爲憑信以上七條如蒙 俞允臣卽敬謹遵行卽從本局開辦臣竊惟同治初年總理衙門請設立同文館講求泰西諸國文字令翰詹部院各官一體入館習練維時議論紛紜人情疑阻風氣未開事因中止後雖經總理衙門設法招徠入館生徒畧有成就而讀書明理之人從事其中者絕少遂致中外間隔彼已不知倉猝應機動多舛誤近者倭人搆毀前鉅痛深一二文人學士默然消息審知富強之端基乎學問講肄所積爰出人才砥礪奮興消除畛域期以洞中外之情形

保 國家於久大此與同治初年設立同文館之意實相表裏誠轉移風氣一大樞  
紐也 開辦初意專歸簡要未盡事務漸圖擴充其藏書刊書游藝學堂諸所有稽  
查諸員老其課業綜理諸員總其綱維各期敬業樂羣毋賢尙齒善資對讓術集眾  
良庶幾成符者擴會通過半之思志學者得師友觀摩之益至局中用款惟延請編  
譯鈔寫書籍與收文簿登記帳目及工匠製造之人發給薪水此外典辦局務翰詹  
科道部院諸臣皆出於誠懇之心忠勤之念但期創開風氣增廣見聞爲異日報効  
國家之用 亦鑒其初心一概不請獎敘不支薪資至印送各路電報只選擇有  
用者照原文鈔錄不加議論凡有關涉時政臧否人物者概不登載以符總理衙門  
原奏所有議立條款請 旨遵辦緣由謹繕招具陳伏乞 皇上聖鑒訓示謹 奏  
以上兩摺均載時務報中因蜀士閱者尙少亟首登以見設報緣起

譯文擇錄

中國各報館始末

宋時嘗論

泰西各國競立報館者何也緣百年之內各國所出新法有益於教養者多故先登報章俾人周知擇善而從之也攷西國日報德國有五百六十種英國一百六十九種法國一百廿八種意大利一百五種比利時荷蘭二國共九十四種其餘各國共有二百五十種合歐洲各國日報共計一千三百零六種每一種每旬計每大可售七千張美國日報九百六十二種南美洲共一百十五種其出報之多也如此然尙未及中國京報之早既而漸入中華各省亦有立此報館者而猶以西人教會報爲多故前有耶穌教會派人查攷中國各報始末去年已經佈列除京報外自始至今共有七十六種計新加坡一帶報有六種香港報亦六種粵東報六種臺灣廈門汕頭共報五種福州報三種甯波報兩種上海報卅二種漢口報五種九江報一種天津報一種北京報一種外有英畫報一種日本畫報二種美國報兩種此等報名及主筆人名某年開設每次共出若干係教會報或教外報其或每日或隔日或隔三日

十日或無一定時日出報暨報價一一記載甚清查出所報之冊知第一次報由嘉慶二十年創如至咸豐十一年計四十六年之久共有八處報館皆教會報也其第一報名察世俗每月統紀開設在馬喇加去新加坡不遠教外第一次報白咸豐十一年出名中外新報開設香港中國人爲主筆嗣後開設愈多有月報日報諸名不必以次序出總之月報三十六種七日報八種日報廿一種其餘或隔一日二日十日等報每報只出一種不如月報日報七日報之多也再七十六報中之六係教會報有數月停止者有數年停止者惟現存每日所出之報則循環日報華字日報中外新報維新日報各出香港廣報出廣東申報滬報出上海時報出天津除此以外現在每月出者卽萬國公報中西教會報閩省會報按四季出者格致彙編等共有二十八種內有十五種係教會報其日報十篇中有二三篇論中外交涉之事惜職此報之人出洋者少未曾周歷外洋故雖論說精微終不免有未中肯處萬國公報中西教會報每報必有數篇皆西國博學之士所著凡五洲教務之事無不通達故欲攷察此教者閱此二報可知以上諸報皆非紙上空談均有據之言也此報不

但論教務亦且論古今各國興衰之故並西國學校之事及格物雜學至於天主教所出之報惟益聞錄最好格致彙編惟論格致最詳凡欲博攷世務者此等報慎勿輕忽也

### 論報館

粵攷古昔盛時有誹謗之木有矇瞶之箴所以通達民隱宣導政事藉佐一代承平之治歐洲各國有君主民主之分深慮下情壅蔽因有報館之設其意與古相仿夫歐洲報館創始正當中國明時迄今未及五百年其初祇登新聞無關緊要繼遂併緊要各事亦與新聞同登久之分門別類新聞益廣上而君相政績下而士庶學業無不採訪周備借管城子爲木鐸因又爲教化之一助然不第此也隣國往來則有交涉之事貨物交易則有通商之事民人爭訟則有案牘之事學校開設則有教育之事自報館興凡電線可通之處卽此一日中各國新聞未有不盡知者矣此報館所以與電線相輔而行也且不獨眾人之事由此可知卽各國興衰之機尙在隱微未露一經報館將其軍政國事揭而論之則人心之從違卽可由此而定近來新學



日出軍械輪船均隨時花樣翻新各國購辦半皆由報章而增見識此外各國之商貨價值起落雖數萬里外亦可於一日之內坐而致之是以泰西人士足跡不出戶庭而天下利弊損益皆可自操其權也查近日歐洲報館林立每日報章可售行一千四百萬張足徵閱報人多然非實有益於人又豈能不脛而走若此之盛耶

新聞紙

采西國學校

泰西新聞爲類甚多學問之類過半格一事悟一理載入新聞舉國均知其益新聞紙之增人智識也大矣

德國前五年計新聞紙共二千七百五十七種前三四年共二千七百九十二種一千八百七十二年共有三千五百種皆是本國文字出之以他國文字出之不與焉以法蘭西文字出者六百九十九種以英國文字出者四百八十種以荷蘭文字出者七十三種以端丁文字出者五十九種以波蘭文字出者六十種以俄羅斯文字出者四十八種以意大利亞文字出者一百五十八種以洪亞理文字出者二十七種以大尼文字出者四十一種以希利尼文字出者九種以播謙文字出者十四種